



Senin, 08 Mei 2023
Ogen: Joel 2:12-17



Jeralah!



Adi uisndu saja ngenca icaingkenndu la kap bias, enda kalimat persuruhan. Joel 2:12-17 I ja Nabi Joel mereken perintah man Israel gelah jera. Ope lenga isehken Tuhan rawana, ope lenga Tuhan nuruh tantara Babil ndedehi ras ngeradasken kalak Israel. Gambaren jera si ituduhkan nabi Joel e me; 1. Mulihkan man Tuhan (berbalik kepada Tuhan). Sedekah enda pengala bangsa Israel lanai kempak Tuhan. Pengalana enggo kempak dewa-dewi bangsa sideban, akapna i je nari lit penampat. Pengalana enggo kempak bangsa-bangsa si megegeh, akapna bangsa si megegeh e ngasup mulahi ia i bas serangan musuh-musuhna nari. Genduari nina nabi Joel, balikken kulandu, pudiken gana-gana bangsa sideban e, pudiken bangsa si megegeh e, alakenlah Tuhan. I bas ngalaken Tuhan e la terjeng kulandu tapi pe pusuh perukurenndu. Dahi mulihi Tuhan e alu tangis dem erkadiola, erpuasa encidahken ate ceda. 2. Pusuh si getem (koyakkanlah hatimu jangan pakainmu) jera e la terjeng bagin si arah darat. Jera e tuhu-tuhu rehna i bas pusuh si mbagesna nari. Ceda kal ate nandangi perbahanen dosa si enggo ilakoken sedekah enda. Igejap maka la kal bo payo adi nundalken Tuhan. Sabab IA kal ngenca si erkuasa, si megegeh ngaturken kegeluhen bangsaNa. Bangsa si deban labo ngasup mereken serpang puluh di kune wari Tuhan e enggo reh. 3. Erlebh man Tuhan. Mindo gelah Tuhan encidahken perkuah ateNa. Kerina perpulungen subuk danak-danak, kalak si enggo dewasa, si mbaru erjabu, kalak si engo metua kerina erlebh mindo perkuah ate. La sada pe ngasup mulahi bana arah ukumen wari Tuhan e. Tapi adi alu mengisngis, dem kinteruken ukur ras erkadiola mindo man Tuhan, lit arapen maka salih ukur Tuhan, la iteruskenna rawanNa tapi ialemina salah bangsana dengen iberekenNa kegeluhen si mbaru. Situhuna Tuhan e melias ras dem perkuah ate, IA sabar dengen tetap icikepNa padanNa. Tetap IA nggit ngalemi dosa ras la iukumNa bangsaNa. Si itimaiNa i bas kita nari e me jera ras dahi IA si ngaturken kegeluhennta.

☞ Tuhan e tuhu melias dengen perkuah